

2. GAIA:

Berrezarkuntzaren sistema (1875-1930)

2.1 Sistema politikoaren oinarriak, indarrak eta oposizioa.

2.2 Politika koloniala.

2.3 Ekonomia eta gizartea Espainian. Auzi soziala.

2.4 Berrezarkuntza sistemaren azken krisia.

2.5 Primo de Riveraren Estatu kolpea eta haren diktadura.

XIX. mendearen bigarren erdialdea Espainiako historian ezegonkortasun politiko sakonak eta etengabeko gatazkak markatutako garai konplexua eta gatazkatsua izan zen. Isabel II.aren erregimen liberal moderatuak ezin izan zuen beharrezko egonkortasunik eta parte-hartze politiko zabalik bermatu; horrek guztiak 1868ko iraultza (La Gloriosa) eta Seiurteko Demokratikoa ekarri zituen. Hala ere, saiakera demokratiko labur horrek ere ez zuen egonkortasunik lortu, ezta arazo politiko eta sozial nagusiak konpondu ere: barne-gatazkak, hirugarren karlistada (1872-1876), Kubako gerra (10 urtetakoa, 1868-1878) eta matxinada militarrek ohikoak izan ziren garai osoan zehar.

Testuinguru horretan, eta herrialdea zatiketa eta nekea egoeran murgilduta zegoela, talde politiko eta ekonomiko kontserbadoreek, bereziki burgesiak, lurjabe handiek eta militar sektore esanguratsu batek, beharrezko ikusi zuten sistema politiko berri bat diseinatzea, egonkortasuna eta ordena soziala lehenetsiko zituena parte-hartze demokratikoaren eta eskubide sozialen aldeko aldarrikapenen gainetik. Aldaketa erradikalen arriskuaren aurreko erreakzioa zen: ordena eta gizarte-bakea aldarrikatzen zituzten, planteamendu politiko berriek euren interes ekonomikoak eta klase-arteko oreka hausteko mehatxua zekartelako.

1874ko abenduan Martínez Campos jeneralak Saguntan emandako estatu kolpe baketsuak amaiera eman zion Lehen Errepublikaren kaosari eta Borboien dinastia berrezarri zuen Alfonso XII. arekin. Aldez aurretik, Cánovas del Castillok Sandhurst-eko Manifestua (1874ko abenduaren 1a) idatzia zuen Alfontso printzearen izenean, monarkia berriaren marko ideologikoa finkatuz: monarkia katoliko, konstituzional eta adiskidetzaila. Estatu kolpea Cánovasek nahi gabe etorri zen, baina Sandhurst-eko Manifestuak prestatua zuen jadanik eraldaketa.

Borboien berrezarpena, eta horrekin batera, sistema politiko berri baten diseinuaren abiapuntua: Errestaurazioa. Sistema honen arkitekto eta ideologo nagusia Antonio Cánovas del Castillo izan zen, politikari moderatu kontserbadorea, historialaria eta orduko elite ekonomiko eta politikoarekin harreman estuak zituena. Hortik dator "Sistema Kanobista" izena.

Eredu politiko berri hau Europako beste herrialdeetan egonkortasun politikoa lortu zuten sistema liberal kontserbadoreen ereduaren oinarritu zuen, bereziki Erresuma Batuko bipartidismoan inspiratua. Helburua argia zen: iraganeko gatazka eta matxinadekin amaitzea, eta etorkizuneko aldaketa politikoak modu kontrolatu eta baketsuan kudeatzeko mekanismoak ezartzea. Hori gauzatzeko, elite politiko eta ekonomikoen arteko akordio zabala bilatu zuen, sistema politikoaren barruan bi alderdiren (kontserbadorea eta liberala) arteko txandakatze baketsua ahalbidetzeko mekanismo bat diseinatu.

Sistema politiko hau, ordea, ez zen benetako demokrazia. Alderantziz, sufragio zentsitario mugatua, hauteskundeak manipulatzeko moduak (kazikismoa) eta herritarren parte-hartze mugatua izan ziren sistemaren ezaugarriak. Eliteek zuzendutako sistema bat zen, eliteen interesen menpe, herritarren

benetako ordezkartza edo parte-hartzea bazegoelaren itxura emanez, egonkortasun politikoa eta gizarte-kontrola helburu nagusitzat zituen.

Sistemak, hasiera batean behintzat, ezarritako helburu nagusia lortu zuen: XIX. mendeko Espainiako sistema politiko nahasia eta gatazkatsua ordenatzea eta egonkortzea. Baina mugak eta gabeziak ere agerian geratu ziren denborarekin: sufragio zentsitarioak baztertutako sektore sozialek, langile mugimenduek, nazionalismo periferikoek eta demokratizazioaren aldeko indarrek gero eta oposizio gehiago egin zuten. XX. mendearen hasieratik aurrera, beraz, tentsio politiko eta sozial berriak pilatu ziren, pixkanaka erregimenaren oinarriak higatuz eta Espainia sostenezina zen egoerara eramanez.

2.1 Sistema politikoaren oinarriak, indarrak eta oposizioa.

2.1.1. Testuinguru historikoa eta sistemaren oinarriak

1875etik aurrera ezarritako Errestaurazioko sistema politikoa, Antonio Cánovas del Castelloren gidaritzapean, berehalako egonkortasuna lortzeko diseinatu zen. Helburu hori lortzeko, sistema politikoari eta parte-hartze demokratikoari muga nabarmenak ezarri zitzaizkion, edozein aldaketa sakonerako joera kontrolpean edukitzeko. Zehazki, sistema berri horren oinarri juridiko eta politikoa 1876ko Konstituzioa izan zen, eta honekin batera, hauteskunde-sistema kontrolatua (kazikismoa), alderdi politikoen arteko txandaketa sistema ("turnismoa") eta oposizioaren kontrol zorrotza.

2.1.2 1876ko Konstituzioa: sistemaren oinarri juridikoa

Esan bezala, Canovas del Castillo izan zen bultzatzaile nagusia, aurreko konstituzioetako ereduen elementuak konbinatuz, baina eredu argi eta garbi kontserbadorea finkatuz. Hain zuzen, 1869ko konstituzio progresista (sufragio unibertsal eta erlijio-askatasunarekin) eta 1845eko konstituzio moderatua (subiranotasun partekatu eta erlijio katolikoarekin) konbinatu zituen, azken hau oinarritzat hartuta. Espainiako historiako konstituziorik luzeena izan zen: 1923 arte indarrean egon zen.

Oinarri juridiko nagusiak hauek ziren:

- Subiranotasun partekatua: boterea erregearen eta parlamentuaren artean banatzen zen, baina erregeak ahalmen handia mantendu zuen (gorreak deitzeko, gobernuak izendatzeko, parlamentua desegiteko eta legeen beto ahalmena).
- Bi ganberetako sistema parlamentarioa: Senatua (goi mailako ganbera, eliteen ordezkartzarekin, hein batean izendapen bidezkoa edo oinordekoa) eta Diputatuen Kongresua (behe ganbera, sufragio mugatu bidez hautatua). Britainia Handiko eredua jarraitzen zuen.
- Erlijio ofiziala Katolizismoa zen, hala ere, erlijio-askatasunaren printzipioa modu mugatuan onartu zen, erlijio minoritarioen jardura pribatua ahalbidetuz.
- Eskubide indibidualen aitorpena (adierazpen-, biltze-, elkarte-askatasuna), nahiz eta kasu askotan lege arruntek mugatu egin zituzten praktikan.

Konstituzioak eredu autoritarioa ezartzen ez bazuen ere, eredu liberal mugatu eta kontserbadore bati erantzuten zion, eliteen interesen aldera jotzen zuen, subiranotasunaren oinarria elite ekonomiko-politikoaren eskuetan mantenduz.

2.1.3 Hauteskunde sistema: kazikismoa eta manipulazioaren mekanismoak

Hauteskunde sistema usteldua izan zen sistemaren bereizgarri nagusietako bat, eta horrek ez zuen aukerarik uzten benetako sistema demokratikoa eraikitzeko. Kazikismoan oinarritu zen, eta hau izan zen haren funtzionamendua:

Bi alderdi politikoen artean adosten zuten alde zuretik hauteskundeetako emaitza, ondoren gobernuak, gobernadore zibilen eta tokiko kazikeen laguntzaz, hauteskundeetan egin beharrekoak egiten zituen, erabakitakoa ateratzeko. Kazikeak herrietako botere ekonomiko eta sozial handien jabe ziren pertsonak ziren (lurra, fabrika edo negozio nagusien jabeak, sarri medikuak edo abokatuak), botoa kontrolatu eta herritarrei zein hautagai bozkatu behar zuten agintzeko gaitasuna zutenak Espainiako hainbat lurralde eta herritan.

Sistema honi "encasillado" deitu zitzaion: hauteskundearen emaitzak aurretiaz erabaki eta kazikeen bidez beharrezko botoak lortzen ziren. Bereiztu behar dira bi mekanismo: encasillado (Madrildik 'aulkien banaketa' aurretik egitea, Gobernazio Ministerioak idatzitako zerrendak) eta pucherazo (botoen iruzur zuzena: hildakoen botoak, hauteskunde-aktak faltsutzea, hauteskunde-mahaiak betetzea). Bi mekanismoek elkarrekin lan egiten zuten emaitza aurretik erabakitakoa bermatzeko.

Horrela, hauteskundeak formaltasun hutsa bihurtu ziren, eta botere politikoa egonkortu zen, baina herritarren benetako parte-hartzea oztopatu ere. Hau izan zen Errestaurazioaren funtsezko ahulgunea, denbora pasa ahala gero eta nabarmena bilakatu eta krisietara eramango zuena.

Garrantzitsua da gogoratzea sufragioa bi fasetan eboluzionatu zela: hasieran sufragio zentsitarioa (1878ko legearekin), hau da, errenta jakin bat zutenek soilik bozkatu zezaketen (gizon helduen %5a inguru); 1890ean Sagastaren gobernuak sufragio unibertsal gizonetzkoa ezarri zuen lege bidez. Aldaketak, ordea, ez zuen sistema demokratizatu: kazikismoak eta encasilladoak dena bere horretan utzi zuten teoriar boto-eskubidea zuten gizon guztiek arren.

2.1.4 Alderdi politiko nagusiak eta txandaketa-sistema

Bi alderdi artean kontrolatu zuten sistema. Hauen arteko txandaketa sistema izan zen sistema honen gakoa, eta alderdi horiek programa politiko nahiko antzekoak zituzten, alde txiki batzuekin:

EZAUGARRIAK: ALDERDI KONTSERBADOREA vs ALDERDI LIBERALA		
	 ALDERDI KONTSERBADOREA	 ALDERDI LIBERALA
 Buruzagia (1875-1900)	Antonio Cánovas del Castillo	Práxedes Mateo Sagasta
 Ondorengoak (XX. m.)	F. Silvela, A. Maura, E. Dato	J. Canalejas, Romanones, García Prieto
 Ideologia	Liberalismo kontserbadorea, ordena	Liberalismo progresista moderatua
 Sufragioa	Sufragio zentsitarioa nahiago	Sufragio unibertsalaren aldekoa (1890)
 Eliza	Estuki babestua	Aldaketa apala (eta 1910eko 'lege kandadua')
 Babesa	Lurjabeak, Eliza, kupula militarra	Burgesia ilustratua, klase ertain liberala
 Sinbolo-neurriak	1876 Konstituzioa, 1876 Foruen abolizioa	1890 Sufragio unibertsala, 1881 Inprenta-legea
	Ordena, egonkortasuna eta tradizioa babesten zituen alderdia. Elite tradizionalen eta Estatuaren jarraikortasunaren aldekoa izan zen.	 Aldaketa neurtuak eta gizarte modernizazioa sustatzen zituen alderdia. Gizarte zabalagoaren ordezkaria eta eskubide politikoen aldeko pausua eman zuen.

Alderdi Kontserbadorea (Antonio Cánovas del Castillo): Zentralismoaren aldekoa, sufragio murriztua, ordena publikoa eta gizarte-kontrol zorrotza defendatzen zuen. Haren babesa elite ekonomiko tradizionala, lur-jabeak eta klase ertain kontserbadorea ziren, baita sektore militar garrantzitsu batzuk ere.

Alderdi Liberala (Práxedes Mateo Sagasta): Liberalismo progresista moderatua, eskubide zibil eta politikoetan sakondu nahi izan zuen (adibidez, 1890eko sufragio unibertsal gizonezkoarena ezartzea), baina funtsezko gaitan (kazikismoa, sistema ekonomikoa eta zentralismoa) ados zegoen Alderdi Kontserbadorearekin: ordenaren mantentzea, gizarte-bakea eta iraultzari beldurra ziren motibazio komun nagusiak. Klase ertain liberalaren eta burgesia ilustratuagoaren babesa zuen.

Alderdi hauek gobernu modu antolatu eta aurreikusgarrian txandakatzen zuten: gobernu krisian sartzen zenean, erregeak beste alderdiari gobernatzeko aukera ematen zion, eta honek hauteskondeak "antolatzen" zituen bere gehiengoa ziurtatzeko.

Sistema horri esker, gatazka politiko handiak ekidin ziren hasieran. Funtsezkoa izan zen 1885eko El Pardoko Ituna: Alfonso XII.aren heriotza-ohanean, Cánovasek eta Sagastak ezkutuan adostu zuten txandaketari eustea Maria Kristina Habsburgokoaren erregeordetzan zehar, dinastiari estabilizazioa emateko. Akordio horrek erakusten du sistemaren benetako oinarria ez zela demokrazia, akordio elitistikoa baizik.

Denborak aurrera egin ahala, gero eta zailagoa izan zen itxurakeria mantentzea, beste behar eta ideologiak zituen jende aurrean.

Bi krisi-une garrantzitsu turnismoarentzat: Cánovasen hilketa (1897, anarkista batek Arrasaten) alderdi kontserbadorea zatitzen hasi zen Silvela, Maura eta Datoren artean. Canalejasen hilketa (1912, beste anarkistaren baten eskutik) alderdi liberala antzeko bidetik joan zen. Bi heriotza horiek, kasualitatea baino, sistemaren higadura politikoaren sintoma argia ziren.

2.1.5 Oposizio politikoaren sorrera eta hedapena

Errestaurazioaren sistema politikoa egonkortasunaren aldeko apustu garbia izan zen hasieratik. Hasierako hamarkadetan (1875etik 1890eko hamarkadara bitartean) arrakasta handia izan zuen: gerra karlistarekin amaitu zuen (1876an), ordena publikoa berrezarri zuen, eta ekonomiaren garapen lasaiago eta egonkorrago baterako oinarriak finkatu zituen. Baina, adierazi dugun moduan, egonkortasun politiko hori sistema itxi eta oligarkiko batean oinarritzen zen, herritarren parte-hartzea oso mugatuta zegoen eta gizartearen sektore zabalak ordezkari politikorik gabe geratzen ziren. Horren ondorioz, pixkanaka oposizio politiko eta soziala sendotzen joan zen eta krisi momentuak sortzean, gatazka eta sistemarekiko kritikak eta zalantzak ugaritu egin ziren.

Oposizio honen sorrera bi arrazoi nagusik azaltzen dute:

→ Parte-hartze politikoaren murrizketa: azaldu ditugun sufragio sistema kontrolatua eta kazikismoaren erabilerak ez zuen herritarren parte-hartze demokratikoa ahalbidetzen. Horrek klase sozial zabaletan eta batez ere langile-klasean frustrazioa sortu zuen, baita klase ertain txikiaren artean ere, ordezkari politikorik gabe sentitzen zirelako. Ordezkari bat, beraien bizitza baldintzak hobetu zitzakeenak.

→ Modernizazio ekonomiko eta sozialaren ondoriozko tentsioak: Espainia industrializazio prozesu batean murgildu zen, baina sortutako aberastasun berria banatzeko era guztiz desorekatua izan zen, eta nabarmenkin ikusten zen gainera. Honek gizarte gatazkak eragin zituen, klase sozialen arteko tentsioak nabarmen areagotuz, gizarte mugimendu berriak indartuz eta politikan hartzeko beharra bultzatuz, gizarte justoago baten bila.

Egoera horretan, hainbat oposizio politiko eta sozial sortu eta hedatu ziren sistema kritikatzeko zutenak:

→ **Errepublikanoak:** Lehen Errepublikaren (1873-1874) ondorengoak ziren, eta hasieratik talde oso zatitua eta babes sozial mugatua izan zuten. Errepublika demokratiko bat bilatzen zuten, sufragio unibertsala, botere banaketa argia eta kazikismoaren amaiera. XX. mendearen hasieran pixkanaka-pixkanaka babesa zabaldu zuten, batez ere hiri handietan eta sektore intelektual eta akademikoen artean, oposizio demokratiko eta erregenerazionista zabalago baten barruan.

→ **Karlistak:** Hirugarren Karlistada amaitu ondoren (1876), karlistak armak utzi eta mugimendu politiko moduan berrantolatu ziren. Monarkia tradizionala eta katolikoa, foruen eta tokiko autonomien defentsa aldarrikatzen zuten. Espainiako mailan bigarren mailako indar bihurtu ziren, baina Euskal Herrian eta Nafarroan indar sozial eta politiko oso garrantzitsua izaten jarraitu zuten. Aldarrikapen tradizionalista honek euskal gizartean foruen galeraren aurkako erreakzio identitarioa piztu zuen, abertzaletasun berria agertzeko bide irekitzen lagundu zuena, Europan eta munduan sortzen ari ziren antzeko mugimenduen bidetik.

→ **Langile mugimendua: sozialismoa eta anarkismoa:** XIX. mendeko azken hamarkadetan, Espainiako industrializazioak langile klase berri eta gero eta zabalagoa sortu zuen, proletariadoa. Langileen bizi-baldintzak izugarri gogorak ziren, esplotazio hutsean bizi eta lan egiten zuten, eta nola ez, politikan ordezkariarik gabe geratzen ziren nahiz eta biztanleriaren zati garrantzitsua izan; Sufragio zentsitarioak eta kazikismoak guztiz baztertu zituen eta ez zien aukerarik ematen politikan parte hartu eta gauzak minimoki hobetzeko. Ondorioz, langileek beraien interesak defendatuko zituzten mugimenduak sortu zituzten:

◆ **Sozialismoa:** 1879an Madrilén Pablo Iglesias-ek (1850-1925) PSOE alderdia sortu zuen, eta 1888an Bartzelonan UGT sindikatua, alderdiarekin ondoz ondoko lotura organikoa zuena. Sozialistek langileen eskubideen aldeko borroka antolatu zuten sufragio unibertsalaren eskaeraren bidez eta parlamentuan parte hartzeko borrokatuz. XX. mende hasieran, sozialismoaren hedapena hirigune industrialetan (Madril, Asturias, Euskal Herria eta Bartzelonan) nabarmena izan zen.

◆ **Anarkismoa:** Espainian indar sozial handia izan zuen, batez ere Katalunian (industria-langileria) eta Andaluzian (nekazal jornalariak). 1881ean FRE (Federación Regional Española) sortu zen, gero FAI-ra (Federación Anarquista Ibérica, 1927) eboluzionatu zuena. 1910ean Bartzelonan CNT (Confederación Nacional del Trabajo) sindikatua sortu zen, anarkismo iberiarraren tresna nagusia. Anarkistek sufragio eta sistema politikoarekiko konfiantzarik ez zuten, eta ekintza zuzenaren bidez (grebak, boikotak eta matxinada puntualak, kasu erradikalenetan biolentzia ere) langileak antolatzen zituzten. 1880ko hamarkadatik aurrera mugimendu anarkista zabaldu egin zen, eta aurrerago landuko ditugun eta sistemaren gainbeheran garrantzitsuak izan ziren 1909ko Aste Tragikoaren eta 1917ko krisi sozialaren protagonisten artean egon ziren.

→ **Nazionalismo “periferikoak”:** XIX. mendearen bukaeran, Errestaurazioaren zentralismo politikoak, lurralde eta kultura-aniztasuna ukatzen zuen sistema politikoa ezarri zuen, helburua, Nazio-batasuna zen, ezberdintasunen gainetik. Foruen abolizioak (1876 Euskal Probintzietan) eta estatu zentralizatuaren politikek, Espainiako nazio-identitate homogenea ezartzen saiatu ziren, baina paradoxikoki, honek erreakzio nazionalisten agerpen indartsua bultzatu zuen. Honela sortu ziren Espainiako Estatu barruan nazio-identitate propio bat zuten lurraldeetan mugimendu nazionalista modernoak, noski, historia eta ezaugarri komunak zituzten lurraldeetan.

Nazionalismoa ideologia politiko moduan Europa osoan zabalduta zen XIX. mendean. Erromantizismoarekin lotutako pentsamendua izan zen, nazioa izaki kolektibo gisa definitzen zuena, bere hizkuntza, kultura, historia eta ohiturekin, eta nazio bakoitzak bere burua politikan modu subiranoan antolatzeke eskubidea aldarrikatzen zuen. Alemanian (Fichte, Herder), Italian (Risorgimentoa) eta Europako ekialdeko hainbat herrialdeetan (Grezia, Polonia, Txekia...) garatu zen batez ere, nazio-estatu berrien sorrera eta independentzia mugimenduak sustatuz.

Korronte hauek penintsulara XIX. mendeko azken hamarkadetan iritsi ziren, bereziki intelektualen eta burgesiaren artean. Gure testuinguruan, abertzaletasun hori autonomismo eta federalismoarekin loturik egon zen hasieran, baina laster berezko bidea hartu zuen nazio-identitate propio eta bereizialde aldarrikatuz.

◆ **Euskal nazionalismoaren sorrera eta garapena:** Euskal Herrian, foruen abolizioaren (1876) ondorengo testuinguruak gehi industrializazioak eta honek zekarren inmigrazio masiboak eta azken finean gizarte aldaketa sakonak sortu zuen euskal nazionalismoaren oinarri politiko eta kultural berria. Foruen galera identitatearen aurkako eraso eta traizio historikotzat hartu zen, eta horren aurrean, euskal gizarteko sektore askotan erreakzio identitarioa eta politiko sutsua piztu zen, defentsa moduan. Gauza bera gertatzen zen, aurrekoari gehituz, industrializazioak ekarritako aldaketa ekonomiko eta sozialak, inmigrazio zabala barne.

Sabino Aranak (1865-1903) jaso zituen herrian sortutako ezinegon eta kezka guztiak eta euskal nortasun nazionala lehen aldiz formulatu zuen modu esplizituan, garaiko nazionalismo europarraren eraginekin abiatuta. Euskaldunak "beste nazio bat" zirela aldarrikatu zuen, Espainiatik guztiz bereizitako hizkuntza, arraza, kultura eta historia propioarekin. Aranak forzaletasun tradizionala bereganatu, eta erlijio katolikoarekin eta pentsamendu kontserbadore batekin lotu zuen ikuspegi modernoak eskainiz.

1895ean EAJ-PNV (Eusko Alderdi Jeltzalea) alderdia sortu zuen, euskal nortasun nazionalaren eta euskal herriaren autogobernu politikoaren aldeko lehen mugimendu politiko gisa. Lehen urteetan sektore sozial oso zehatzetan izan zuen arrakasta: Bizkaiko burgesia txikia, merkataritza- eta industria-jardueretako klase ertainak, eta batez ere hirietako eta herrietako erdi mailako klaseak. Sektore hauek identitate euskal-nazionalaren eta industrializazio modernoaren arteko oreka bilatzen zuten. Horrek bultzada handia eman zion alderdiari XX. mende hasieran, eta honek euskal politikaren protagonista nagusi bihurtu zuen azkar.

◆ **Katalanismo politikoaren sorrera eta garapena:** Katalunian, nazionalismoaren garapena prozesu kultural eta ekonomikoetara loturik agertu zen lehenik, eta ondoren mugimendu politiko moderno gisa eratu zen. Hasiera batean, Renaixença mugimendu kultural katalanak (XIX. mende erdialdetik aurrera) hizkuntza eta kultura katalanaren berpiztea aldarrikatu zuen. Baina

laster, ekonomia garapenak (ehungintzaren industria, merkataritza) eta Kataluniako burgesia industrial eta komertzialaren interesek bultzatuta, mugimendu hau politikan sartzen hasi zen, autonomismo eta federalismoaren alde eginez.

XX. mendearen hasieran, Enric Prat de la Riba eta Francesc Cambó bezalako intelektual eta politikarien eskutik, nazionalismo politiko modernoa eratu zen. 1901ean Lliga Regionalista sortu zen, autonomia politikoaren eta interes ekonomiko eta kultural katalanen defentsarako mugimendu gisa. Kataluniako burgesiaren eta klase ertain urbanoaren sektore zabalen babesa izan zuen, eta autonomia politikoa eta ekonomikoa aldarrikatu zuten, baina Espainiako Estatuaren baitan, nazio katalanaren eskubide historiko eta politikoak defendatuz.

◆ **Nazionalismoen hedapena eta ondorioak:**

- Estatu zentralistak baztertutako sektore sozialak erakartzea: tokiko burgesia txikia eta klase ertaina batez ere, estatu zentralistaren politikek kaltetutako taldeak izan ziren. Nazionalismoa beraien interes politiko eta ekonomikoen ordezkaritza berria bihurtu zen.
- Modernizazio sozial eta ekonomikoaren eragina: bi eskualde hauetan industria eta merkataritza garapena nabarmen izan zen, eta horrek tokiko interes ekonomiko eta politiko bereziak sortu zituen. Abertzaletasunak eskualde horietako burgesiaren eta klase ertainen ordezkari politiko eta ekonomiko bihurtu ziren.
- Errestaurazioko sistema politikoaren itxitasuna eta krisia: kazikismoak eta sufragio mugatuak demokraziaren garapena oztopatu zuten, eta oposizio berri hauek benetako parte-hartze demokratikoa eta tokiko autogobernua aldarrikatzen zituzten. Honek sistemaren kontrako kritika eta oposizio sozial eta politiko handia eragin zuen, etengabeko gatazka sortuz, denborarekin asko sakondu zena.
- XX. mendearen lehen hamarkadetan, nazionalismo periferiko hauek Espainiako sistema politikoaren krisiaren eta erregimenaren aldaketaren protagonistak izan ziren. Euskal nazionalismoa eta katalanismoa oso indartsu agertu ziren XX. mendeko hasieratik, eta autonomiaren eta federalismoaren aldarrikapenak gero eta indartsuagoak izan ziren, Espainiako politikaren eztabaidan betirako txertatuz, gaur arte, alegia, eta Errestaurazioaren krisian eta amaieran funtsezko faktore bihurtuz.

→ **Erregenerazionismoa:** 1898ko hondamendi kolonialaren ondoren, erregenerazionismo izeneko mugimendu kritiko eta intelektuala sortu zen, Joaquín Costa buru zuelarik. Mugimendu honek sistemaren oinarritzko erreformak eskatzen zituen ("Europaizatzea eta desoligarkizatzea"), hauteskunde-sistema demokratizatzea, kazikismoa ezabatzea eta herrialdearen modernizazio ekonomiko eta sozial sakona bultzatuz. Joaquín Costa (1846-1911) buru, baina 98ko Belaunaldia ere aipatu behar da: Miguel de Unamuno, Pío Baroja, Azorín, Valle-Inclán, Antonio Machado, Ramiro de Maeztu... Idazle hauek 1898ko hondamendiaren ondoren Espainiaren 'arima nazionala' eta atzerapena gaitzat hartu zituzten. Erregenerazionismoa pentsamendu politikoa bazen, 98ko Belaunaldia adierazpide kultural eta literarioa zen — bi aurpegi bera, identitate-krisi nazionalaren aurrean.

Mugimendu hau politikan ez bazen zuzenean sartu ere, oposizio sozial zabal bat sortu zuen sistema kanobistaren aurka, kritika intelektuala eta moraletik abiatuta. XX. mende hasieran oposizio

demokratiko eta sozial berrien oinarri ideologiko nagusietako bat izan zen eta eragin handia izan zuen gizartearen ikuspuntuetan.

Beraz, Errestaurazioko sistema politikoak, Cánovasen gidaritzapean, egonkortasuna ekarri zuen baina ez zuen benetako demokrazia garatu. Txandakatze baketsua, kazikismoa eta sufragio mugatua izan ziren bere ezaugarri nagusiak. Urteekin, mugimendu sozial, politiko eta nazionalistek sistema hau kolokan jarri zuten, pixkanaka-pixkanaka haren krisia eta azken amaiera prestatuz.

2.2 Politika koloniala.

2.2.1 Testuingurua eta Espainiako inperioaren egoera XIX. mendearen amaieran

XIX. mendearen bigarren erdian, Europako potentzia kolonial nagusiek (Erresuma Batuak, Frantziak eta Alemaniak bereziki) Afrika, Asia eta Ozeano Barean kolonia berriak konkistatzen eta zabaltzen hasi ziren. Garai hartan, inperio kolonial handiak nazio-identitatearen, potentzia ekonomikoaren eta ospe politikoaren sinboloak ziren. Espainia, ordea, XIX. mendean zehar bere kolonia nagusi gehienak galdu ondoren (Latinoamerikako independentziekin 1810-1825 artean), mende amaieran soilik Karibeko uharte nagusiak (Kuba eta Puerto Rico), eta Pazifikoko Filipinak mantentzen zituen. Hauetan arazo politiko eta sozial handiak zituzten ordurako.

Espainiak ez zuen politika kolonial eraginkorrik sortu kolonietan egonkortasuna, modernizazioa eta integratzea ahalbidetzeko. Kontrakoa, gobernu espainiarrak kolonien kontrol politiko-militarra, administrazio zentralista eta bertako ekonomien ustiapen ekonomikoa lehenetsi zituen, autonomia politikoari edo modernizazio sozial eta ekonomikoei uko eginez eta ondorioz, kolonietan tentsioak eta nazionalismo lokalak piztuz, bereziki Kuban eta Filipinetan. Horrez gain, kanpoko herrialdeen presioak ere egon ziren, kolonialismo berrien garaia zen, Espainia gainbehera ari zen inperio zaharra zen..

2.2.2 Kubako auzia eta independentzia gerra 1868-1898

Kuba Espainiaren inperio kolonialaren ardatz ekonomiko nagusia zen XIX. mendearen bukaeran, bereziki azukrearen ekoizpenari esker. Espainiarentzat estrategikoa zen, baina bertako biztanleen egoera ekonomikoa eta soziala oso larria zen: zapalkuntza soziala, esklabotzaren jarraipena 1886ra arte, eta autonomia politikoaren falta izan ziren tentsio nagusien jatorria.

1868an "Hamar urteetako gerra" (1868-1878) piztu zen, lehen independentzia saiakera garrantzitsua. Espainiak gerra hori amaitu ahal izan zuen "Zanjon itunarekin" (1878), baina, nahiz eta horrela adostu bakea lortzeko, uharteari ukatu egin zitzaion benetako autonomia politikoa. Itun horretan autonomia politiko moderatua hitzeman bazen ere, Espainiako gobernuak neurri horiek ez zituen bete, sekulako hanka sartzea izan zelarik. Egoerak ez zuen hobera egin, eta 1879-1880 artean ("Guerra Chiquita") tentsioa mantendu egin zen.

1895ean, José Martí idazle eta liderrak beste altxamendu garrantzitsu bat hasi zuen Espainiako agintearen aurka: Independentzia Gerra (1895-1898). Martíren mugimenduak Kubako sektore sozial zabalen babes handia izan zuen: nekazari txikiak, klase ertain urbanoak eta bertako eliteak, autonomia ekonomiko eta politikoaren alde elkartu ziren. Espainiak Valeriano Weyler jenerala bidali zuen Kubara matxinada zapaltzeko. Weyler-ek taktika militar oso gogorrak erabili zituen, populazio zibila

kontzentrazio-esparruetara eramanez, milaka pertsonen heriotza eraginez eta nazioarteko gaitzespen handia jasoz. Egoerak Espainiaren nazioarteko isolamendu diplomatikoa ekarri zuen.

2.2.3 Filipinetako altxamendua eta gatazka kolonialen hedapena 1896-1898

Kuban egoera larritzen ari zen bitartean, Filipinetan ere independentziaren aldeko mugimendu nazionalista piztu zen 1896an. Espainiak, Kuban bezala, neurri militar gogorrekin erantzun zuen. Filipinetan gertatutako altxamenduak erakusten zuen kolonietako Espainiaren politika zentralista eta zaharkitua, bai Karibean zein Asian, arazo sakonak sortzen ari zela. Inperio zahar baten azken saiakerak ziren.

2.2.4 Ameriketako Estatu Batuen esku-hartzea eta Espainiaren porrota (1898)

1898an, egoera hau Estatu Batuetako interes estrategikoekin talka egin zuen. AEBek Karibean eta Pazifikokoan interes ekonomiko, militar eta estrategiko nabarmenak zituzten, eta Kubako eta Filipinetako gatazkak erabili zituzten beren eragina zabaltzeko, inperialismo zabal eta berri baten pausuak ziren. 1898ko otsailaren 15ean, La Habanako portuan, 266 marinela hil ziren. Gertaeraren benetako kausa argitu gabe dago oraindik (gehienek istripua dela uste dute orain), baina AEBetako prentsa horiak Espainiari leporatu zion gerra-arrazoa bilatzeko: "Remember the Maine, to hell with Spain!". Gerra apirilaren 25ean deklaratu zen. Espainiak ez zuen gaitasun militarrik eta ekonomikorik potentzia berri horren aurka egiteko, eta gatazka oso laburra izan zen: hiru hilabetetan (apiriletik uztaile) Espainiak erabateko porrota jasan zuen.

2.2.5 Ondorioak

Independentzia mugimenduen ondorioz, Kuba formalki independentzia lortu zuen zen, baina AEBen babes eta kontrol politiko eta ekonomikoaren menpe geratu zen. Puerto Rico eta Filipinak berriz, zuzenean Estatu Batuen kontrolpean geratu ziren Parisko Itunaren bidez (1898ko abenduan).

Espainiak, kolonia garrantzitsuenak galdu ondoren, gelditzen zitzaion nazioarteko ospea eta bere kolonien azken hondarrak galdu zituen.

1898an bizi izan zuen porrota "98ko Hondamendia" XIX. mendeko Espainiaren krisi kolonialaren eta nazionalaren amaiera izan zen. Porrot honen ondorioak sakonak izan ziren:

- Identitate nazionalaren inguruko krisia eta eztabaida sakona sortu zuen Espainian, Inperio izatetik, kolonia guztiak galtzera, zalantza egiten zen, krisian sartu zen nazioaren inguruko pentsamendua.
- Ekonomiaren krisia: Espainiako enpresari eta merkatarik askok beren merkatu nagusiak galdu zituzten, batez ere azukrearen, tabakoaren eta merkataritza kolonialaren galerarekin. Horrek Espainiako hainbat sektore ekonomiko larri kaltetzea ekarri zuen.
- Sistema politikoaren krisia: Errestaurazioko sistemaren zilegitasuna eta egitura kolokan jarri zen. Elite politikoaren eta gobernuen ospea erabat galdu zen herritarren aurrean. Kritikak eta aldaketa politikoaren eskaerak zabaldu ziren.
- Erregenerazionismoaren sorrera: Espainiako intelektual askok (Joaquín Costa buru zutelarik) kritika sakona egin zuten sistema politiko eta ekonomikoari, "Europaizatzea eta desoligarkizatzea" eskatuz. Mugimendu honek gizarte eta politika erreformen alde egin zuen XX. mendearen hasieran.
- Abertzaletasun periferikoen sendotzea: 1898ko krisiak nazionalismo periferikoen (euskal eta kataluniar nazionalismoak bereziki) indartzea bultzatu zuen, Espainiako estatuaren ahulezia aprobetxatuz, krisi identitarioa, beren aldarrikapenak eta autonomia politikoa sakontzeko.

1898ko hondamendia mugarri garrantzitsua izan zen Espainiaren historian: aro berri baten hasiera markatu zuen, non erreforma politiko eta sozialak, abertzaletasun periferikoen aldarrikapenak eta Espainiako identitate nazionalaren berrikustea ekarriko zuten, horrek suposatu zituen erresistentzia eta gatazka guztiekin batera.

2.3 Ekonomia eta gizartea Espainian. Auzi soziala.

2.3.1 Ekonomiaren egoera eta modernizazio mugatua

XIX. mendearen azken hamarkadetan Espainian ekonomia garapen esanguratsuak gertatu ziren, baina oso modu partzialean eta desorekatuan. Industrializazioa nabarmen garatu zen Katalunian (ehungintza-industria) eta Euskal Herrian (siderurgia eta burdingintza), baina prozesu horrek ez zuen Espainiako lurralde osoa barne hartu. Hala, garapen ekonomikoak lurralde batzuk soilik aberastu zituen, eta beste gehienetan nekazaritzan oinarritutako ekonomia atzeratuarekin jarraitu zuten.

Industria-garapenaren ondorioz, Kataluniak eta Euskal Herriak modernizazio azkarra bizi izan zuten: fabrikak eta meategiak sortu ziren, trenbideak eraiki ziren eta Espainiako merkatu nazionala zabaldutakoak. Baina hazkunde ekonomiko horrek ez zuen aberastasunaren banaketa justu bat bermatu; kontrakoak, langile eta nekazari sektore handiak pobrezia kroniko eta bizi-baldintza gogorretan mantendu ziren hamarkada luzeetan.

Espainiako ekonomian atzerapena nekazaritzan izan zen nabarmenena. Nekazaritza, oro har, oso produktibitate baxua zuen, eta Andaluzian, Extremaduran eta Gaztelan, lur-jabetza handien (latifundioak) sistema nagusitu zen, lur gehienak familia gutxi batzuen eskutik egonik. Ondorioz, milaka nekazari eta jornalari pobrezian bizi ziren, eta horrek migrazio handiak eragin zituen hiri handietara eta atzerira. Migrazio horiek beste hainbat arazo eragin zituzten.

2.3.2 Industrializazioaren ondorio sozialak eta langile klasearen sorrera

Industrializazioak, alde ekonomiko positiboak ekarri zituen arren, langile klasearen egoera sozial eta ekonomiko oso prekariora ekarri zuen. Hirigune handietan (Bartzelona, Bilbo, Madril edo Asturias), langileen lan-baldintzak izugarri gogorrak ziren: lanaldi luzeak, soldata txikiak eta bizileku guztiz prekariorak. Segurtasun eta higie baldintza eskasek lan-istripu ugari eta gaixotasunak eragin zituzten. Ez zegoen inolako eskubiderik, ez langabezi ordainketarik, ez aseguru istripuen aurretan, etab.

Langileak hirietako kanpoaldeetan pilatu ziren, langile-auzo pobreetan, bertako bizi baldintzak izugarriak zirelarik: pilaketa, gaixotasunak eta pobrezia kronikoa ziren nagusi. Hiri handietan, garai horretan, klase sozialen arteko desberdintasunak oso nabarmenak ziren, eta horrek tentsio soziala asko areagotu zuen.

Langile klaseak bizi zuen egoera larriak "Auzi Soziala" deritzon fenomenoak piztu zuen XIX. mendearen bukaeran. Termino honek langile klasearen baldintza larriak eta horien ondorioz sortutako gatazka sozial eta politikoak biltzen ditu. Europatik Espainiara iritsitako sozialismo eta anarkismoaren ideien eraginez, langile mugimendu sozial eta politikoak agertu ziren, egoera horri aurre egiteko modu bakar moduan.

Lehen aipatu dugun sozialismoaren sorrera eta indartzea Espainian garrantzi handikoa izan zen. 1879an Pablo Iglesias-ek PSOE sortu zuen, eta 1888an UGT sindikatua sortu zen. Sozialismo espainiarrak sistema kapitalistaren barruan erreforma sozialak aldarrikatzen zituen, langileen bizi baldintzak hobetu eta eskubide sozial eta politikoak bermatzeko: sufragio unibertsala, lanaldia murriztea, laneko baldintza

duinak eta babes soziala. Sozialismoak bereziki Espainiako hirigune industrialetan eta Asturiasen hedapen nabarmena izan zuen XX. mende hasieran. Arazoa zen, sistema politiko ustelak ez zuela benetako aukerarik uzten partaidetza politiko esanguratsu bat lortzeko.

Anarkismoa ere indar sozial handia izan zen Espainiako langile mugimenduan, bereziki Katalunian eta Andaluzian. Espainiako anarkistek langileen emantzipazio sozial osoa aldarrikatzen zuten eta ekintza zuzena erabiltzen zuten mobilizazio bide nagusi gisa, ez baitzuten estatuan ala demokrazian sinisten. 1910ean CNT sindikatua sortu zen, langile mugimendu anarkistaren antolakuntza nagusia bihurtuz. Mugimendu honek oso azkar hedatu zuen bere eragina Kataluniako eta Andaluziako langile klasearen artean, eta XX. mende hasieran gatazka sozial askoren protagonista izan zen.

1919-1923ko pistolismoa Bartzelonan: Lehen Mundu Gerraren ondorengo krisia eta La Canadienseko greba (1919) eta gero, sektore patronala eta CNT 'pistolari'-en bidezko kale-borrokan sartu ziren. Bertako gobernadore zibilak "Ihes-egitearen Legea" (Ley de Fugas) erabili zuen — atxilotuei tiro egitea ihes-saiakeraren aitzakian. CNT-ko buruzagiak hil zituzten, eta erantzun gisa CNT-k Eduardo Datoren hilketa antolatu zuen 1921ean. Gatazka horrek 1923ko estatu kolperako bidea prestatu zuen.

Langile klasearen egoera larriari landa munduko egoera sozial larri bezain gatazkatsua gehitu behar zaio. Lur-jabetza handien sistema latifundista batez ere Andaluzian, Extremaduran eta Gaztelan, nekazari eta jornalari askoren egoera sozial eta ekonomikoa oso larri bihurtu zen, miseria kronikoa eta lan baldintza oso gogorrak jasaten zituzten.

Ondorioz, XX. mendearen hasieran nekazarien mobilizazioak eta gatazkak areagotu ziren lur-jabe handien aurka, lurra birbanatzeko eta erreforma sozial eta ekonomikoa eskatuz. Nekazarien egoera horrek gizarte gatazka larriak sortu zituen, eta nabarmen kolokan jarri zuen sistema liberal oligarkikoaren zilegitasuna eta etorkizuna.

2.3.3 Auzi sozialaren ondorio politikoak

Gizartearen sektore handiek sistema liberal oligarkikoan beren behar sozialei eta ekonomikoei erantzuteko gaitasunik ez zutela ikusirik, sistemaren zilegitasuna sakon higitu zen. Langileen eta nekazarien mugimenduek erreforma sozial eta politiko sakonak aldarrikatu zituzten, sufragio unibertsala, lan erreformak eta gizarte-justizia eskatuz. Baina argi zegoen, gero eta gehiago denbora aurrera egin ahala, ez zela modu baketsuan ezer esanguratsurik lortuko.

XX. mendearen lehen hamarkadetan gatazka sozial hauek sistema politikoaren desegonkortasuna areagotu zuten, 1909ko Bartzelonako Aste Tragikoarekin eta 1917ko krisialdi sozial eta politikoarekin. Sistema liberal oligarkikoak ezin izan zien arazo horiei erantzun egokia eman eta, azkenean, 1923an Primo de Riveraren estatu kolpearen bitartez amaitu zen.

Klase sozialen arteko gatazkak larriagotzen joan ziren XX. mendearen lehen hamarkadetan. Egoera hori nabarmen okertu zen 1909an Bartzelonan eta 1917an Espainia osoan, bi gertakari hauek Errestaurazioaren garaiko sistema politikoaren krisialdia bizkortu zuten mugarriak bihurtu zirelarik.

1909ko Bartzelonako Aste Tragikoa

Bartzelonako Aste Tragikoa XX. mendearen hasieran Espainiako gatazka sozialaren sinbolo bihurtu zen. Altxamendu hau 1909ko uztaillean gertatu zen Bartzelonan, eta haren jatorrian hainbat faktore sozial, ekonomiko eta politiko egon ziren.

Testuinguru historikoa Rifeko gerrara (Maroko) lotuta dago. Espainiako armadak Marokoko protektoratuan gerran ari zen, Afrikako eremua bere kontrolpean mantentzeko helburuz. 98ko kolonien galera ondoren, Maroko zen ejerzitoaren eta kolonialismoaren azken borroka-eremua, ospea mantedu ala galtzeko gatazka. Espainiako gobernuak gerrara soldadu gehiago bidali behar izan zituen, eta Bartzelonako familia xumeetako gazte asko eraman zituzten derrigorrezko soldadutzan. Gerrara soldadu aberatsen semeek ez joateko aukera zuten, soldadutzatik salbuetsita egotea erosi zezaketelako, eta horrek gatazka soziala piztu zuen. Gerrara bidalitako gazte asko Bartzelonako langile-klase eta nekazari pobreen semeak ziren, eta bidegabekeria honek haserreareagotu zuen hiriko sektore sozial zabalen artean.

1909ko uztailaren 26an, Bartzelonako sindikatu eta langileen taldeek greba orokorra deitu zuten soldaduen bidalketaren aurka. Hasiera batean protestak baketsuak izan baziren ere, egoera azkar larritu zen. Protesta elizaren aurkako matxinada bihurtu zen, elizak, komentuek eta eskola erlijiosoek kapitalismoarekin, eliteen justifikazioarekin eta boterearekin zuten loturagatik. Protesten haserrearen ondorioz, hainbat eraikin eta ikastetxe erlijioso erre ziren, eta istiluak eta kaleko borrokak hainbat egunez iraun zuten.

Gobernuak gogor erantzun zuen: Bartzelonara tropa militar ugari bidali ziren protestak zapaltzeko, eta egoera oso odoltsua izan zen. 100 hildako baino gehiago izan ziren eta milaka atxilotu. Gobernuak, gainera, protestetan parte hartutakoak gogor zigortu zituen, Francisco Ferrer Guardia pedagogo anarkista bezalako liderrak epaitu eta fusilatuz, adibidez. Ferrerren fusilamenduak nazioartean Espainiako gobernuaren aurkako protesta eta kritika gogorrak sortu zituen, baina baita Espainian bertan sistema politikoaren kontrako erreakzio handia ere.

Bartzelonako Aste Tragikoaren ondorio politiko nagusia izan zen agerian geratu zela Errestaurazioaren sistemaren izaera errepresiboa eta elite politikoaren urruntasuna herritarren behar sozial eta politikoaren aurrean. Altxamendu honek Espainiako sistema liberal oligarkikoaren krisia nabarmen azkartu zuen eta Espainiako gizartean sektore zabalek aldaketa politiko eta sozialaren beharra argiago ikusi zuten.

1917ko krisialdia

1917ko krisialdia Espainiako gizarte eta politika garaikidearen beste mugarri garrantzitsu bat izan zen, eta sistema politikoaren krisia azkartu zuen berriro ere. Krisialdi honek hainbat faktore ekonomiko, sozial eta politiko izan zituen:

Lehenik, testuinguru ekonomikoa eta soziala oso zaila zen Espainian. Lehen Mundu Gerraren ondorioz (1914-1918), Espainia neutral mantendu zen, baina gerrak Europan sortutako krisi ekonomiko eta sozialaren ondorioak pairatu zituen: inflazio altua, oinarritzko produktuen prezioen igoera, langabezia handia eta herritarren bizi-baldintzen narriadura nabarmena. Aldi berean, irabazi handiak zituzten enpresa eta jabe askok, klaseen arteko distantziak gehiago zabalduz. Langileen egoera larri horrek mobilizazio sozial handiak piztu zituen, batez ere industria-gune nagusietan.

1917ko krisialdiak hiru fronte bereizi izan zituen, bata bestearekin lotuta: UGT eta CNT sindikatuek elkarrekin greba orokor handia deitu zuten 1917ko abuztuan, langileen baldintza ekonomiko eta sozial hobek aldarrikatuz eta sistema politikoaren demokratizazioa eskatuz. Greba oso zabala izan zen Espainia osoan, baina gobernuak tropa militarren bidez gogor zapaldu zuen. Errepresioaren ondorioz,

hainbat hildako, zauritu eta atxilotu izan ziren, eta horrek herritarren eta langileen artean gobernuaren aurkako sentimendua are gehiago zabaldu zuen.

1917ko krisiak sistema liberal oligarkikoaren krisialdia sakondu zuen eta argi utzi zuen Errestaurazioko sistemak ez zuela gaitasunik Espainiako gizartearen sektore zabalenen beharrak eta aldarrikapenak erantzuteko. Sistema politikoaren zilegitasuna ahuldu zen, eta horren ondorioz, Primo de Riveraren diktadura (1923-1930) iristeko baldintzak azkartu ziren.

Ondorio orokorrak

Laburbilduz, bai 1909ko Bartzelonako Aste Tragikoak eta bai 1917ko krisialdiak Espainiako Auzi Sozialaren une erabakigarriak izan ziren. Bi gertakari hauek agerian utzi zuten industrializazioak eta kapitalismoaren hazkundeak sortutako gatazka sozial sakonak, baita sistema politiko liberal oligarkikoaren ezintasuna ere, gizartearen behar sozialei eta demokratizazio eskaerei erantzuteko. Krisialdi hauek, azken batean, Errestaurazio sistemaren gainbehera azkartu eta Espainiako historia garaikidearen hurrengo etaparen oinarriak ezarri zituzten.

2.4 Berrezarkuntza sistemaren azken krisia.

1875ean ezarritako Errestaurazioko sistema politikoa hasieran funtzionatu bazuen ere, sistema horrek oinarri ahulak zituen, izan ere, bake eta egonkortasun itxura hura ez zen parte-hartze politiko zabal eta benetakoa; elite ekonomiko eta politikoen kontrolpean zegoen eta herritarrek ez zuten benetako ordezkaritza. Honek, sortuko ziren krisi ezberdinen ondorioz, eta partiduek hauei erantzuteko erakutsi zuten gaitasun faltagatik, kolokan jarri zuten sistema bera XX. mendearen hasieratik.

2.4.1 Sistemaren gainbehera: ahultasunak eta tentsioak

Berrezarkuntza sistemaren azken krisia ez zen ustekabekoa izan. 1898ko porrot koloniala izan zen lehen atzerapauso handia; dakigunez, Espainiak Kubako eta Filipinetako koloniak galdu, eta horrek gizartean eta politika-sistemaren legimitatean kolpe handia eman zuen. Gainera, gizartean eta ekonomiaren egituretan aldaketa geldiezinak gertatzen ari ziren: industria garapena, langileriaren gorakada, eta auzi sozialen larritasuna handitzen joan ziren, baita Kataluniako eta Euskal Herriko abertzale mugimenduen indartzea ere. Horrez gain, bi alderdien arteko txandaketak gero eta artifizialagoa eta baztertzailagoa bihurtu zen, eta herritarren desadostasuna handitu egin zen, ustelkeria nabarmentzen zen bitartean.

2.4.2 1917ko krisia: sistema kolokan

Lehen azaldu dugun moduan 1917. urtea garrantzitsua izan zen erregimenaren krisi sakonaren inflexio-puntuan. Lehen Mundu Gerran Espainia neutral egon bazen ere, barnean krisi ekonomiko eta sozial handiak pairatu zituen: inflazioa igo, elikagaien prezioak garestitu, eta langileen bizi-baldintzak okertu ziren. Horren testuinguruan, hiru krisi nagusi lehertu ziren aldi berean; bat lehen aipatu dugu:

→ Militarren krisia: "Defentsa Juntak" izeneko taldeak sortu zituzten ofizialek, beraien interesak defendatzeko, sindikatuen antzera, baina Estatuaren instituzio ardatzezko batean. Horrek armadaren kontrola kolokan jarri zuen, Gobernuak kontsezioak egin behar izan zielako. Alfonso XIII.ak militarren babesa eman zien, eta horrek zibilen eta militarren arteko tentsioak areagotu zituen. Armadan, sistemaren funtzionamendu orokorraren kontrako diskurtsoa zabaldu zen, politikari guztiak berdin

omen ziren eta beraien gaitasun faltak eramaten omen zuen Espainia zegoen krisi egoerara. Armadaren barruan bi joera kontrajarri zeuden:

- Junteroak / penintsularrak — penintsulan zerbitzatzen zuten ofizialak, Defentsa Juntak antolatuta. Soldada-igoerak antzinatasunaren arabera eskatzen zituzten, ez Marokoko meritu militarren arabera.
- Africanistak — Marokon zerbitzatzen zuten ofizialak, mailaz azkar igotzen zirenak gerra-meritu bidez. Hemen prestatu ziren gerora gerra zibilean protagonista izango ziren ofizialak: Franco, Mola, Goded, Sanjurjo, Millán-Astray, Yagüe...

→ Krisi politikoa: Bartzelonan "Parlamentarioen Asanblada" izeneko parlamentari talde batek erreforma sakonak eta egiazko ordezkaritza politikoa, demokrazia, eskatzen zuen eta Bartzelonan parlamentu alternatiboa antolatu zuten. Gobernuak ez zen gai izan egiten ziren zentzuzko eskakizunei erantzuteko, debekatuz beraien jarduera eta legez kanpo utziz. Horrez gain, sortutako gatazka soziala, Bartzelonan oso nabarmena, sindikatuek aldarrikatutako grebaren ondorioz, ekintza bertan behera uztera eraman zituen parlamentario hauek. Hala ere, agerian utzi zuen krisi politiko sakona zegoela Estatuan.

→ Krisi soziala: Lehen azaldu bezala, UGT eta CNT sindikatuek abuztuan greba orokorra deitu zuten, hasieran baketsua izan bazen ere, bortitza bihurtu zen, eta armadak gogor erreprimitu zuen, liderrak atxilotu eta lau buruzagi fusilatu zituzten.

Egoerak sistema politikoaren egitura eta legimitatea zalantzan jarri zituen, aldaketa sakonak ezinbestekoak zirela erakutsiz, Estatuaren jarraipena bermatu nahi bazen.

2.4.3 Marokoko gatazka eta Annualetako hondamendia (1921)

1898ko inperio-porrotaren ondoren, Espainiako klase politiko eta militarrek Marokon presentzia handitu nahi zuten; azken gunea zen Herrialdearen gaitasuna eta nazioarteko garrantzia nolabait mantentzeko, baita ejerzitoaren ospea ere. Melilla eta Rif eskualdeak okupatu zituzten, baina 1921ean Abd-el-Krim buruzagi rafiarraren matxinada batek 8.000-13.000 soldadu inguru hil ziren Annualetako guduan. Porrota ez zen bakarrik militarra izan, guztiz usteldua zegoen sistema baten sintoma izugarria izan zen:

- Gobernuak eta armadak elkarri egotzi zioten errua. Inork ez zuen ardura bere gain hartu nahi izan.
- Prentsak "Expediente Picasso" izeneko ikerketa argitaratu zuen (Picasso generalak egindakoa), armadaren eta gobernuaren ustelkeria eta arduragabekeria salatuz. Frogak izugarriak ziren, arduragabe jokatu zuten hainbat eta hainbat instantzia, gobernutik, kupula militarretik pasata, Marokon zeuden militarrenganaino.
- Erregearen papera ere zalantzan jarri zen, Alfonso XIII.ak operazio militarren zuzendaritzan parte hartu baitzuen, nahiz eta ez izan nahiko formakuntza ala gaitasunik.

Annualetako hondamendiak sistemaren osoaren ospea eta egonkortasuna hondoratu zituen behin-betiko, armadaren kritikak gabezia nabarmena erakutsi zuen, eta militarismoaren gorakada bultzatu zuen. Manuel Fernández Silvestre jenerala bera ere hil zen, Berenguer-ek inolako babesik gabe utzi ondoren. Erregea (Alfonso XIII) zuzenean inplikaturik zegoen Silvestrerekin telegrama bidezko komunikazio pertsonalean — horrek erregearen ardura zalantzan jarri zuen Expediente Picasson. Expediente Gorteetan eztabaidatu behar zen 1923ko irailaren 20an — Primo de Riverak kolpea irailaren 13an eman zuen, hain zuzen, espediente blokeatzeko ere.

Ez zegoen sistema mantentzeko modurik, ez bazen estatu kolpe baten bidez, armadak beharko ez lukeen protagonismo politikoa hartuaz, eta hori izan zen gertatu zena, Alfontso XIII.aren onespenerekin. Primo de Rivera generalak, 1923an estatu kolpea eman zuen Bartzelonan, “ordena” eta, nola ez “nazioaren salbazioa” aldarrikatuz.

Primo de Riveraren estatu kolpea (1923): autoritarismoarako bideari hasiera

Sistemaren gainbehera eta gizartearen gatazka sozial eta politikoak, baita Marokoko porrota, testuinguru egokia izan ziren autoritarismoaren sorrerarako. 1923ko irailean, Miguel Primo de Rivera jeneralak estatu kolpea egin zuen Bartzelonan, "ordena eta nazioaren salbazioa" aldarrikatuz.

Berrezarkuntza sistemaren azken krisia ez zen krisi isolatu bat izan, urteetan pilatutako tentsio eta ahultasunen ondorioa baizik. Primo de Riveraren estatu kolpea ez zen sistema baten aurkako erresistentzia, haren porrotaren adierazle nabarmena eta zutik mantentzeko azken errekurtoa baizik. Errestaurazioaren egonkortasun hutsalak eta demokratizazio falta sakonak gizartearen benetako integrazioa oztopatu zuten, eta horrek autoritarismoaren ateak ireki zituen. Horrela, diktadura militar batek ordezkatu zuen, eta honek Espainiako gizartearen zatiketa areagotu zuen, baita etorkizuneko gatazka eta lurrikararen lehen seinaleak erakutsi ere.

2.5 Primo de Riveraren Estatu Kolpea eta haren diktadura.

2.5.1 Kolpearen zergatia eta testuingurua

1923ko irailean, Espainiako sistema politikoa agortuta zegoen. 1917tik aurrera, Errestaurazioaren azken krisiak agerian utzi zuen sistema hura ez zela gai eguneroko arazo sozial eta politiko larriei aurre egiteko. Kazikismoan oinarritutako hauteskunde-sistema guztiz deslegitimatuta zegoen; langileen mugimenduak eta gatazka sozialak gero eta bortitzagoak ziren; militarren artean amorrua eta frustrazioa nagusi ziren Annualeko (1921) hondamendiaren ondoren, eta ekonomia egoera ezegonkorrean zegoen.

Testuinguru honetan, 1923ko irailaren 13an, Miguel Primo de Rivera jenerala, Alfontso XIII.aren babesarekin, estatu kolpe militar bat gauzatu zuen Bartzelonan, eta Madrilgo gobernuak —erresistentziarik gabe— boterea eman zion. Herriarren artean ez zen oposizio sendorik egon ere, alderdi tradizionalak zein langile mugimenduak ahulduta zeuden, zatiak eta indar gutxirekin.

Horrela hasi zen Espainiako lehen diktadura militar modernoa, lehen aldiz XIX. mendeko txandaketa-sistematik eta sistema konstituzionaletik kanpo, eta autoritarismo berri bat ezarri zen.

Horrez gain, gizartearen zati batean Riveraren diskurtsoa erakargarria izan zen hasiera batean, modernizazio prozesu bat planteatzen zuen, ustelkeriaren aurkako borroka, ordena eta segurtasuna eta herriarren borondatea errespetatzeko intentzioa. Planteamendu autoritarioak ezkutatu egin zituen, noski.

2.5.2 Hasierako helburuak eta lehen fasea: Direktorio Militarra(1923–1925)

Primo de Riverak, hasiera batean, “bitarteko irtenbide” gisa aurkeztu zuen bere agintea: “Espainia konpontzera” zetorren, ez sistema iraunkor bat ezartzera. Beraz, ez zuen konstituzioa indargabetu ofizialki, baina bai Gorteak desegin, Konstituzioaren aplikazioa bertan behera utzi, eta militarrez osatutako gobernu bat, Direktorio Militarra, ezarri.

Bere helburuak, ofizialki, honako hauek ziren:

- Ordena publikoa berreskuratzea.
- Administrazioa eta finantza publikoa eraginkorrago egitea.
- Estatua berrantolatzea eta "Espainia moralki eta materialki berregitea".
- "Aberriaren osotasuna" babestea (euskal eta kataluniar nazionalismoaren aurka).

Hasierako urteetan diktadurak zilegitasun maila handia izan zuen sektore askotan:

- Burgesia pozik zegoen gatazka soziala eta grebak murriztu zirelako.
- Enpresariak gustura zeuden ordenaren itzulera ikusita.
- Eliza Katolikoa oso babestua sentitu zen.
- Monarkia diktadurarekin guztiz identifikatu zen, erregearen jarraipenerako hanka sartze latza.

2.5.3 Bigarren fasea: Direktorio Zibilaren etapa (1925–1930)

1925ean, militarrek Rifeko gerra amaitu zuten arrakastaz Alhucemasko lehorreratzearekin (Marokoko kostaldean), eta horrek Primo de Riveraren ospea handitu zuen. Une horretan, zibilen parte-hartzea handitu eta Gobernuak zibil bihurtu zuen, baina autoritarismoa eta demokrazia-eza mantenduz.

Hainbat erreforma bultzatu zituen:

→ Ekonomian:

- Obra publiko handiak: errepideak, trenbideak eta azpiegitura modernizatzeko planak abiarazi zituen.
- Monopolio publikoak sortu zituen (adib. CAMPSA, petrolioaren arloan).
- Korporatibismoaren ideia aplikatzen saiatu zen: sindikatu bertikalak, non langile eta enpresaburuak elkarrekin egongo ziren, klase-borrokari aurre egiteko.
- Espainia autarkia ekonomiko baterantz jo zuen: barne-produktuak lehenetsiz eta merkatuaren ordez estatuaren interbentzioa sendotuz.

→ Politikan eta gizartean:

- Alderdi politiko guztiak deuseztatu zituen. Horren ordez, bere mugimendu propioa sortu zuen: Unión Patriótica, baina ez zen alderdi politiko bat, estatua babesteko tresna bat baizik, aipatu bezala ideologia zehatzik gabe.
- Prentsaren eta adierazpen askatasunaren murrizketa aplikatu zen.
- Kataluniako autonomia- eta hizkuntza-adierazpen oro debekatu zituen; Sabadell edo Terrassa bezalako herri-izenak gaztelaniaratu egin ziren.
- Euskal Herrian ere, euskararen erabilera eta foruen aldarrikapenak jazartu ziren.

Ezin bada faxista moduan ulertu, eta ez bazuen ideologia sistematiko bat, Riverak bazituen bere jardueran Europar sortzen ari zen faxismoaren zenbait ezaugarri eta inspirazio.

2.5.4 Porrota: diktaduraren ahultzea eta amaiera (1929–1930)

Urteak pasa ahala, diktaduraren hasierako babes soziala higitzen joan zen. Pixkanaka-pixkanaka langile mugimenduaren aurkako errepresioak gizarte desadostasuna handitu zuen, oposizio mugimendua handituz proletariadoaren artean. Horrez gain, Unión Patriótica ez zen inoiz benetako oinarri politikoa bihurtu, eta ez zegoen benetako zilegitasunik herritarren artean. Bere alde agertu ziren sektoreetan ere, Burguesia eta militar sektore batzuk hasiak ziren zalantzak agertzen. Eta guztia nahasteko, krisi ekonomiko globala (1929) Espainian ere somatzen hasia zen.

Azkenik, gaixotasunak eta bakartze politikoak jota, Primo de Riverak 1930eko urtarrilean dimisioa aurkeztu zuen. Haren ondorengoak (Berenguer eta Aznar, militarrek ere) ez zuten diktadura leundu ezta

sistema politiko demokratiko baterako trantsizioa prestatu ere, baina garbi zegoen ere ez zegoela Espainiako gizartean nahiko jarraitzailerik sistemari jarraipena emateko.

2.5.5 Ondorioak

Primo de Riveraren diktadurak ez zuen Errestaurazioaren krisiari irtenbiderik eman ahal izan (gaitasunik izan). Alderantziz, Sistema liberalaren aurkako autoritarismoaren bidea normalizatu zuen, eta gainera Alfontso XIII.a guztiz identifikatu zenez diktadorearekin, monarkiaren zilegitasuna ere kaltetuko zuen. Denbora honetan, zentzuzkoa denez, Errepublikar mugimendua sendotu egin zen, alternatiba modernizatzaile baten bila, eta oposizioaren zati handiak batzeko erreferente bihurtu zen, baita eskuineko indarren artean ere.

Hori guztia kontuan hartuta, Primo de Riveraren diktadurak atea ireki zion Bigarren Errepublikari (1931), baina baita Espainiako gatazka sakonenei ere: estatuaren egiturari buruzko eztabaida, eredu ekonomikoari buruzko gatazkak eta identitate kolektiboaren zatiketaren ingurukoak. 1930eko abuztuaren 17an, Donostiako Ituna sinatu zuten errepublikar indarrek (Lerroux, Azaña, Indalecio Prieto, Maciá, ANV... EAJk ez zuen egin). Itunak monarkiaren amaiera eta Errepublika sortzea adostu zituen. 1931/04/12ko udal hauteskundeetan hiri nagusietan errepublikarrek irabazi zituzten. Apirilaren 14an Alfonso XIII.a Espainiatik atera zen, eta II. Errepublika aldarrikatu zen.

Berrezarkuntzaren sistema politikotik 50 urte wo igaro ostean, Espainiak lortu zuen egonkortasun instituzionala eta gatazka militarren bukaera, baina oinarri faltsuetan eraikita zegoen, ez zituen aurretik bazeuden egiturazko arazoak konpondu eta egoera guztiz arriskutsua sortu zuen hurrengo hamarkadetarako: parte-hartze politikoa itxurazkoa zen, hauteskundeak manipulaturik zeuden eta masa herritarrak sistematik kanpo mantentzen ziren. Industrializazioak eta gizarte aldaketek Espainiako egitura tradizionalak astindu zituzten heinean, gero eta zailagoa bilakatu zen sistema hori eguneroko errealitateari egokitzea. Langile mugimendua, nazionalismo periferikoak eta intelektualen kritika gero eta ozenagoak ziren.

Hainbat krisi pilatu ziren XX. baina Errestaurazioa ez zen herriaren eskariz bukatu, ezta aldaketa demokratiko baten bidez ere, baizik eta bere inertziaren ondorioz kolapsatu zen. Horrek erakusten du: parte-hartzerik gabe eraikitako sistema batek ezin du irauteko gaitasunik izan aldaketa sozial eta politiko sakonen aurrean.

Ardatzezko kontzeptu-ideia batzuen azalpena:

- Anarkismoa: Estatuaren eta autoritate ororen aurka dagoen ideologia, gizabanakoaren askatasun osoa defendatzen duena. Espainian XIX. mendearen amaieratik CNT sindikatuaren bidez antolatu zen, batez ere Katalunian eta Andaluzian.
- Antiklerikalismoa: Elizaren botere politiko eta sozialaren aurkako jarrera. Errepublikanoek, sozialistek eta anarkistek bultzatu zuten, batez ere hezkuntzaren eta aberastasunaren inguruan.
- Autarkia: Herrialde batek bere baliabideekin ekonomia propioa garatzeko duen helburua, kanpoko merkataritzarik gabe. Frankismoan garatu zen gehien, baina aurrekari ideologikoak bazeuden aurretik ere.

- Bipartidismoa: Bi alderdi nagusiren (Kontserbadoreak eta Liberalak) arteko boterearen txandaketa, aurrez adostuta. Ez zegoen lehiarik benetan: hauteskundeak manipulatu egiten ziren.
- Caciquismoa: Tokiko boteredun edo "kazikeen" sistema bezalakoa, botoak kontrolatuz eta sistemaren egonkortasuna bermatuz. Hauteskunde iruzurraren oinarria zen.
- Demokrazia: Herritarren parte-hartze politikoan oinarritutako sistema. Errestaurazioan demokraziaren itxura egon arren, ez zen errealitate demokratiko bat: sufragio mugatua eta iruzurra baitziren oinarria.
- Defentsa Juntak (Juntas de Defensa): XX. mendearen hasieran militarrek sortutako taldeak, armadaren barruko hierarkia eta soldatak defendatzeko. 1917ko krisian garrantzi politikoa izan zuten.
- Emigrazioa: Espainiatik atzerrira joandako biztanleen mugimendua, batez ere Amerikara. Nekazarien pobrezia eta aukera faltak bultzatuta, milioika espainiar emigratu zuten XIX. amaieratik aurrera.
- Erregenerazionismoa: 1898ko krisiaren ondoren sortutako pentsamendu mugimendua, Espainia moralki, sozialki eta politikoki berritzeko beharra defendatzen zuena. Intelektual ugari eta politikaren sektore moderatu batzuk biltzen zituen.
- Errepublikak: Monarkiarik gabeko estatu-forma, non boterea herritarren ordezkarien bidez gauzatzen den. Espainian bi izan ziren: 1873ko Lehen Errepublika eta 1931ko Bigarrena.
- Errestaurazioa: 1874an Alfonso XII.aren tronurako itzulerarekin hasitako sistema politikoa. Antonio Cánovas del Castillok diseinatu zuen eta helburua egonkortasun politikoa eta ordena soziala mantentzea zen.
- Federalismoa: Estatuaren antolamendu politikoa, non hainbat erkidegok autonomia maila handia dute. 1873ko Errepublikan garatu zen, baina arrakastarik gabe amaitu zen.
- Hezkuntza nazionala: Estatuaren eskutik zentralizatu eta laikoa izateko asmoa zuten erreformek bultzatutako sistema. Hala ere, Elizaren eragina oso nabarmena zen oraindik.
- Inmigrazioa: Atzerritik Espainiara etorritako pertsonen mugimendua. Ez zen oso handia garai honetan, baina industriagune batzuetan (Euskal Herria, Katalunia) izan zen mugimendurik.
- Industrializazioa: Manufaktura eta industria-jarduera hedatzea, batez ere Katalunian eta Euskal Herrian. Horrek langile klasearen sorrera eta auzi sozialaren azaleratzea ekarri zuen.
- Kolonialismoa: Espainiak Kuban, Puerto Ricon eta Filipinetan mantendu zuen dominazio politiko eta ekonomikoa. 1898an galdu zituen, eta horrek sistema astindu zuen.
- Kontserbadurismoa: Tradizioaren, monarkiaren eta Elizaren defentsan oinarritutako ideologia. Errestaurazioko sistema politikoaren zutabe nagusietako bat izan zen.
- Korporatibismoa: Langileen eta enpresarien arteko gatazkak saihesteko, klaseak elkarrekin antolatzea proposatzen duen sistema. Primo de Riveraren garaian saiatu zen bultzatzen.
- Latifundismoa: Lur sail handien pilaketa jabego gutxi batzuen esku. Espainiako hegoaldean oso ohikoa zen eta nekazari pobreen zapalkuntzaren iturri nagusietako bat.
- Liberalismoa: Estatuaren kontrola mugatu, eskubideak zabaltu eta legearen aurrean berdintasuna defendatzen duen ideologia. Espainian, liberalismo kontserbadorea (Cánovas) eta aurrerakoia (Sagasta) bereizi ziren.
- Militarismoa: Armada politikan sartzeko joera. Espainian tradizio luzea zuen eta Errestaurazioaren amaieran gero eta agerikoagoa bihurtu zen.
- Monopolioa: Enpresa batek sektore ekonomiko oso baten gaineko kontrola lortzen duenean. Garai hartan, adibidez, tabakoaren monopolioa estatuaren esku zegoen.
- Nazionalismoa (periferikoak): Espainiako Estatutik bereizten ziren identitate propioen (Katalunia, Euskal Herria...) defentsa. XIX. amaieran sortu ziren eta foruen galerarekin lotuta zeuden.
- Oposizio politikoa: Sistemaren aurka agertzen ziren indarrak: errepublikanoak, karlistak, langile mugimenduak eta nazionalistak. Hauen eragina pixkanaka handitzen joan zen.

- Progresismoa: Liberalismoaren adar aurrerakoiena, eskubide zibil eta politikoen aldekoa. Sufragio unibertsala, hezkuntza laikoa eta erreforma sozialak defendatzen zituen.
- Proletariotza: Industria garaiko langile klasea, jabetzarik gabekoa. Langile mugimenduaren eta sindikalismoaren oinarri soziala izan zen.
- Sindikalismoa: Langileen interesak defendatzen zituzten erakundeak (UGT, CNT) eta euren borroka sozial eta ekonomikoa. Grebak eta mobilizazioak ohiko bihurtu ziren.
- Sozialismoa: Langileen eskubide politiko eta sozialak defendatzen dituen ideologia. Espainian PSOE (1879) eta UGT (1888) izan ziren bere erakunde nagusiak.
- Sufragio zentsitarioa: Botoa emateko baldintza ekonomikoak ezartzen zituen sistema. Gizartearen zati handi bat hauteskunde prozesutik kanpo uzten zuen.
- Txandakatze sistema: Errestaurazioan ezarritako mekanismo politikoa, non bi alderdi nagusiek boterea txandaka hartzen zuten hauteskunde kontrolatuez baliatuta.